

Xujun xi kits'ínkjihi nda postru Pablo xuta ninku Efeso

B'i ts'ín kikjaniñaha Pablo xuta ninku xi tjín nanki Efeso

¹ An Pablo, an xi kama nku nda postruhu Jesucristo at'aha Ntíaná b'a ts'ín kama mjehe. Tífaniñanuu jun xuta Efeso xi kikj'áts'enuu Ntíaná, jun xi s'ejinnuu Cristo Jesu.

² Kas'enuu kjuanda ko kjuajyu xi tsjáná Ntía Na'miná ko Nda Ntíaná Jesucristo.

B'i ts'ín tsakúya Pablo kjuandaha Ntíaná

³ Kan'etsjoho Ntíaná xi Ntíaha ko Na'mihi Nda Ntíaná Jesucristo. Kui xi kits'ín nga ajihín Cristo kisakúná ngayje tíkjá ni nda xi nibáha ndjiojmi ján, ni xi tsjáná Espirituhu. ⁴ Cristo kits'ínchjén nga j'ájinná kintehe ni nga kits'ínnda asuntee tu xi kjuáts'ehená ko tu xi najmi s'ehená jé nginkun. Tjoho Ntíaná ñá. ⁵ Kui nga y'enda tíjtuhun nga Jesucristo ts'ínchjéhen tu xi ntíhi tsichu ma-haná. Tsitjusun xi nkú ts'ín kama tsjoho ko kama mjehe. ⁶ Kui nga kan'etsjoho ra Ntíaná xi bakúchji kjuanda chánkaha, kjuanda xi sakújinná Ntíhi xi tu xí tjohó ra.

⁷ Kisaténdzjo jníhi Ntíu. B'a ts'ín kis'echjintjaihi jéná ko kin'endyjat'aná ngatitsunná. Kama xi nkú tjín bichú kjuachánkaha kjuandaha Ntíaná. ⁸ Kui kjuandoo xi tu ni xí kitsjáháná tu xi s'ehená ngayje tíkjá kjuankjintak'un ko tu xi kamankjihinná ni

xi ts'e. ⁹ Y'éjña chjiná ni xi kama mjehe nga ts'ín, xi y'éjña 'ma nistjin nk'ie. Kama tsjohō nga y'enda titjun ni xi ts'ín Cristo. ¹⁰ Y'enda nga nkuhú kuichúk'iekú ajihin Cristo ngayjee ni xi tsichuba ndjiojmi ján kō asunntee. B'a kama nk'ie nga ja kuichú chubā. Ts'íntjusun ni xi ja y'enda.

¹¹ Xi nkú ts'ín y'enda titjun Ntíaná, b'a ts'ín kits'ínchjén Cristo tū xi j'ájihinni jin xi ntje judio tjeheenni kō kitsjáni ni xi tsjáha ntíhi. B'a kits'ín at'ahā Ntíaná ts'íntjusun ngayjee ni xi b'enda. ¹² Kō jin kichuyáhi ni nda xi sakújinni Cristo. Jin tjun b'a kin'eí. Kui nga tín'etsjohō rá Ntíaná xi tjihin kjuachánka.

¹³ Jun bi kinu'yó kō kis'ejinnuu én xi naxu tjin. Kui xi én nda tsuhu Jesucristo xi kits'ínk'ankinnu. Kō Cristo kits'ín nga kin'ekjóhōon Espirituhu Ntíaná, Espiritu xi kitsúya titjun nga tsjá. B'a ts'ín kis'ejña chjihi nga Ntíaná ts'enuu. ¹⁴ At'ahā tsjá titjun Espirituhu tū xi chaha nga n'ekjáihin ni xi tsjáha ntíhi nk'ie nga kama ndáíjehe xutā xi ja kis'echjintjai. Kui nga kan'etsjohō rá Ntíaná xi tjihin kjuachánka.

B'i ts'ín kinchjantjai Pablo xutā ninku nanki Efeso

¹⁵ Kui b'a maha, nkúhu nga kint'e nga s'ejinnuu Nda Ntíaná Jesu kō nga tjonuu ngayjee xutā xi ts'e Ntíaná, ¹⁶ najmi tít's'ínkj'áíya nga nchjantjájinnu nk'ie nga nchjaka Ntíaná kō tsjáha máb'achjíhi nga nda tímat'on. ¹⁷ Tíbankihí xi Ntíahā Nda Ntíaná Jesucristo, Na'mi xi tjihin kjuachánka, nga Espirituhu katsjájinnu kjuankjintak'un kō k'uéjña

chjinuu ni xi ts'e, tu xi kamankjihinnuu nkú tjihin ra ngat'a ts'e Ntíaná.

¹⁸ Tíbankihi nga kakjex'ájin kjuankjink'unnuu tu xi chahanu ni xi tókuyáha xuta xi Ntíaná j'ájihin ko tu xi chahanu xi nkú ts'ín chánka ni xi ts'ínkjáihin xuta ts'e. ¹⁹ Mjena nga choo xi nkú ts'ín chánka ts'ati nga'yúhun Ntíaná, nga'yún xi basinkoná ñá xi s'ejinná éhen. Kui nga'yún xu'bo bakúchji ni xi ts'ín Ntíaná. ²⁰ Kui xi kits'ínxájihin Cristo nk'ie nga Ntíaná kits'ínkj'áiyaha ngabayoo ko kits'ínk'íéjñat'aha Ntíaná nk'a ján, yo má batéxuma.

²¹ Kitsjáha ante xi 'yún nk'a ajihin ngayjee xi batéxuma asunntej ko xi tjihin xá, xi yankjún, xi nk'a tjen ko xi tjihin tu mí xáhá ni xi yankjún. Najmi tu nku nistjin xi kich'aá nd'ai b'a ts'ín nk'a tjen, ko ní nistjin xi kj'uai askahan. ²² Ngayjee ni xi tjin aya ntsja Cristo y'éya Ntíaná ko y'éjña títjun ya Cristo nga kuatéxumaha ngayjee ni xi tjin ngandaha xuta ninku. ²³ At'aha xuta ninku, kui xi yjonintehe Cristo ko Cristo xi ts'ín nga kama ndjuú tu mí nihí ni. Tsa ni xi najmi tjihin xuta ninku, najmi ma ndjuú Cristo kai.

2

B'i ts'ín tsakúya Pablo nk'ie nga n'ek'ankiná tu ngat'aha ni xi kits'ín Cristo

¹ Jun bi tu ngat'aha ngatitsunnuu ko jénuu xutak'ien kamo. ² Nk'ie tintsubajiun jénuu xi nkú ts'ín tíjñaha xuta asunnte xu'bi ko xi nkú ts'ín mjehe ndaninda k'aku xi tjihin nga'yún ajihin séen. Kui xi tít'sínxájihin nd'ai xuta xi najmi nt'é'éhen Ntíaná.

³ Ngatentee b'a ta n'e tintsubaá nistjin nk'ie xi nkú ts'ín kinchjaha anímaná asunntee. Kin'eé ni xi kama mjehe aníma ngatitsunná kō ni xi tjinjin kjuankjink'unná. Xi nkú k'aán nk'ie, ñá tsuhuná kjuakjahan Ntíaná xi nkúhu xuta xingisoo. ⁴ Tunga tu ni xí ma nímahá ra Ntíaná xuta, kui nga 'yún kits'íntjohoná. ⁵ Kui kjuaha kits'ínk'íéntu tik'unkohoná Cristo nk'ie nga ja tsayahaá ngatitsunná. Ngat'aha kjuandaha tu tít's'ínk'ankihínuu Ntíaná.

⁶ Ntíaná ta ñja kits'ínkj'áiyakoná Cristo ngabaya xi tintsubajían kai kō kits'ínk'íéntukoná Cristo ndjiojmi ján. ⁷ B'a kits'ín tu xi nistjin xi nibáha kuakúchjihi xi nkú ts'ín chánka tijná kjuandaha, kui xi tu xí ndahá, at'aha nda tsasená ngat'aha ni xi kits'ín Cristo Jesu. ⁸ Ngat'aha kjuandaha Ntíaná ts'ankihinu at'aha kis'ejinnuu. Ntía níná tu kits'ínk'ankihínuu. Najmi jun manuu n'o ni xu'bí. ⁹ Najmi ngat'aha ni nda xi kin'eé ts'ankihiná, tsa tu xi b'a ts'ín tjin xi nk'a k'uásjehe yjoho. ¹⁰ Ntíaná kits'ínndaná. Y'éyaná xi nkúhu Cristo nga kits'ínndaná tu xi n'ehená ni xi nda xi y'énda títjun kō tu xi kuintsubajihinná ni xi ndoo.

B'i ts'ín tsakúya Pablo nk'ie nga Cristo nkuhú ntje kits'ín ma xuta judio kō xi najmi judio

¹¹ Kui b'a maha, jun xi najmi ntje judio kich'o nga kitsiun, n'ekj'áítsjehennu xi nkú n'e tintsuboo nistjin nk'ie. Xuta xi najmi kin'ehe ni circuncision kitsúnuu xuta xi ntje judio tjeheñ ra, at'aha kui xi ts'íhín yjoninintehe ni circuncision. ¹² N'ekj'áítsjon nga kui nistjiun tintsuba t'axíhuun Cristo kō nga najmi ntjehe xuta Israel jun. Najmi kama ts'ajun

ni xi y'éndakō títjun Nt̃ianá xut̃a xi ts'e, ni xi kitsúya títjuhun nga tsjáha. Ndaha nku ni xi tsjáha Nt̃ianá xut̃a xi ts'e najmi t́ichuyóhoo nga sakúnuu kai. Chub̃a tintsubanú asuntee nga najmi yo Nt̃ianá. ¹³ Kjin tintsuboo nistjin nk'ie, tunga nd'ai nkuhú ja kamakoo Cristo Jesu kō ja tintsuba tiño tū ngat'aha jní xi tsaténdzjo Cristo.

¹⁴ Ngat'aha Cristo t́ihinná kjuajyu. Kui xi nkuhú ntje kits'ín ma xi ntje judio t́ehen rá kō xi najmi ntje judio t́ehen rá. Kikjexuba xjō xi y'échjaha xut̃a nk'ie tū xi nkuhú kamaha. Kikjexín ni xi ngji kontraha rá xinkjín xut̃a. Kitsjá yjonintehe ¹⁵ tū xi y'éjña t'axíhin kjuatéxuma xi kin'ekjas'ehen Moise xi nkjin ni t́ít'aha. B'a ts'ín nkuhú ntje tsetse kits'ín maha nga joō kō nkuhú kits'ín mako yjoho. Kits'ín nga tsichut'áha xinkjín nga nkúnkú. ¹⁶ K'ient'á kruu tū xi nkuhú ntje ts'ín maha nga joō kō nga kuinchjako nda ngáha Nt̃ianá. B'a ts'ín kikjexíhin ni xi ngji kontraha rá xinkjín xut̃a.

¹⁷ Cristo j'ai tsjá én nda tsu, kui xi y'a kjuajyu. B'a ts'ín kisakúhunuu kjuajyu jun xi kjin tintsuboho Nt̃ianá nistjin nk'ie kō ta kisakúhu kjuajyu xi tiña t́jintu. ¹⁸ Ngat'aha Cristo xi ntje judio t́ehen rá kō xi najmi ntje judio t́ehen rá ma bichút'aha Nt̃ianá nd'ai. Nkuhú Espirituhu Nt̃ianá xi ts'ín nga bichút'ahaá.

¹⁹ Kui b'a maha, najmi ta xut̃a kj'aíhinu kō ta ndaha xut̃a xi t́ímasún. Ja ní tsichumo kō jun xut̃a xi ts'e Nt̃ianá kō nkuhú ja makoo xut̃a xi t́íntunkí nk'íehen Nt̃ianá. ²⁰ Jun xi nkú joyaha nku ni'ya xi tímanda, xi já postru kō já profeta kik'atuts'ihin. Tunga Jesucristohó kitsjá xáha nga b'a incha ts'ín.

²¹ Cristo be xi nkú ts'ín ngjuai ni'yoo. Nk'ie nga kama ndjuú ni'yoo, nku nínku xi tsje kamaha Ntíaná. ²² Jun xi y'ahanuu Cristo bichúmo nínku xi má nga tíjñaya Espirituhu Ntíaná.

3

B'i ts'ín kitsúya Pablo xá xi kik'aihi

¹ An Pablo ngat'aha Cristo Jesu kjiya'yúhunna. B'a tímat'an tu ngat'aha ngandanuu jun xi najmi ntje judio tjeheennuu. ² Yo nga kik'aina nga k'uenijmínuu kjuandaha Ntíaná. ³ Tsakúchjina ni xi y'éjña 'ma nistjin nk'ie, xi nkú nga ja ta kuak'iet'ánuu. ⁴ Nk'ie nga n'eyo xujuin, choo nga be sisian ni xi kis'ejña 'ma ngat'a ts'e Cristo. ⁵ Kui niu xi najmi kik'inyaha xuta xi kis'e nú chá ján nk'ie, tunga nd'ai Espirituhu Ntíaná ja tsakúchjihi já postruhu ko já profetaha Ntíaná ⁶ nk'ie nga xuta xi najmi ntje judio tjehe ra ta ts'ínkjáihin ni xi tsjáha Ntíaná ntíhi ko ta kuichú ma nku yjonintehe Cristo ko ta sakú yaha ni xi kitsúya títjun Ntíaná nga tsjáha xuta xi ts'e. Én nda tsuhu Cristo xi b'a ts'ín.

⁷ Ntíaná tu kitsjáhana nga k'uenijmía én nda tsu xu'bi. Kjuandaha Ntíaná xi b'a kits'ín. Kitsjana xi nkú ts'ín tjehe ra nga'yún chánkaha. ⁸ An xi 'yún ichi sa ajihin ngayjee xuta xi ts'e Ntíaná, tunga kik'aihina kjuandaha nga túb'enijmíhi xuta xi najmi ntje judio tjehe ra kjuanchinaha Cristo xi ndaha nku najmi ch'a mankjinyehe. ⁹ Tíb'ejña chja xi nkú ts'ín títbitusun ni xi y'éjña 'ma Ntíaná nistjin nk'ie, kui xi kits'ínnda ngayjee ni xi tjin. ¹⁰ B'a ts'ín xuta nínku túb'ejña chji nd'ai xi nkú

tjín kjuankjink'uhun Ntíaná, kjuankjink'un xi kj'ái kj'ái ts'ín yaha. Kui ni xu'bi tís'ejña chji nginkun xi tjíhín xá kō xi tjíhín nga'yún nk'a ján.

¹¹ Kui niu xi y'énda tíjūn Ntíaná nkúhu nistjin nk'ie kō Ndā Ntíaná Jesucristo ja kits'íntjusun niu nd'ai. ¹² At'aha nkuhú makaá Cristo kō at'aha s'ejinná én nda tsuhu, kui nga tsuhu rá tak'aán kō najmi binkjaán nga bichúk'un tiñahaá Ntíaná. ¹³ Kui b'a maha tibankehinu nga najmi tu n'ekjehe ruu tak'un ngat'aha nga un tíbena ngandanuu. Ngat'aha nga un tíbena, Ntíaná tít'sín nga tís'ejña chjínuu kjuachánkaha.

B'i ts'ín kitsúya Pablo xi nkú ts'ín bankintjái xuta ninku Efeso

¹⁴ Kui kjuaha báasinkúnch'ihinna nginkun Ntía Na'miná. ¹⁵ Kui xi b'ejña nga s'e nga nkúnkú ntje xi tjín ndjiojmi ján kō asunntee. ¹⁶ Bankihí nga Espirituhu Ntíaná katsjá nga'yúnkohonuu xi nkú ts'ín tíjña kjuachánka tsjo tjíhín tu xi s'ehe rá nga'yún animanuu, ¹⁷ kō nga Cristo kat'ejñajin animanuu tu ngat'aha nga s'ejinnuu. Katji nanka kjamanuu ajihín kjuatjoo kō ndjá tinchajiun, ¹⁸ tu xi b'a ts'ín jun kō ngayjee xuta xi ts'e Ntíaná kama kamankjihinnuu xi nkú ts'ín tayá kō ndju kō nanka kō nk'a kjuatjoho Cristo. ¹⁹ Mjena nga choo kjuatjoho Cristo tu xi b'a ts'ín katsejín kikjihinnuu Ntíaná, ndaha tsa 'yún chánka sa kjuatjoho nga ni xi mankjinná.

²⁰ Kan'etsjoho Ntíaná, kui xi ts'ati ni xi maha ts'ín nga xi nkúhu ni xi binchihí kō tsa xi nkú ts'ín títtsu animaná nga kama. B'a ma xi nkú ts'ín tíjña nga'yún xi ts'e xi tít'sínxájiná. ²¹ Kats'ínkjáihín

Nt̃ianá k̃juachánka ajiḥin x̃ut̃a ñinku xi ts'e Cristo Jesu. Tehente b'a katuma k̃o santaha t̃u nk'éhé ñi. Johon, b'a katuma.

4

B'i ts'ín tsakúya Pablo nk'ie nga nkuhú tinchajián Cristo

¹ Kui b'a maha t̃bankih̃inu an xi k̃jiya'yán ngat'aha Nd̃a Nt̃ianá. Kix̃i tankínk̃o yjonuu xi nkú ts'ín t̃jihin nga ts'ín x̃ut̃a xi Nt̃ianá j'ájiḥin. At'aha Nt̃ianá j'ájinuu. ² Ñim̃akjua n'esjo yjonuu k̃o nda kas'eya añimanuu. Kas'enuu k̃juatsenta k̃o b'i ngján n'e'yún tak'un xink̃iu. B'a n'oo t̃u ngat'aha k̃uat̃jo xi t̃jñajinuu. ³ Tjen nga'yúhuun yjonuu nga nkuhú katumak̃o tehento xink̃iu xi nkú ts'ín tsjáñiyánu Espirit̃uhu Nt̃ianá k̃o xi nkú ts'ín nkuhú ts'ín manuu k̃juaj̃yuu.

⁴ Nkuhú maha yjonintehe Cristo k̃o nkuhú maha Espirit̃uhu Nt̃ianá xi t̃jñ̃a. B'a t̃a ts'ín nkuhú j'ájinuu Nt̃ianá, kui nga nkuhú ñi xi t̃ichuyóh̃o.

⁵ Nkuhú maha Nd̃a Nt̃ia xi t̃jñ̃a. Nkuhú ñi xi s'ejinná k̃o nkuhú Nd̃a Nt̃ianá n'ekjas'eheén x̃ut̃a nga batentáhaá. ⁶ Nkuhú maha Nt̃ianá xi Ña'miná ngatenteé, kui xi batéxumaha, ts'ínchjén k̃o t̃jñajih̃in ngayjee ñi xi t̃jín.

⁷ Tunga kin'ekjáih̃in raá k̃juanda nga nkúnkáá. Xi nkú ts'ín kits'indzoná Cristo, b'a ts'ín kisakúná.

⁸ Kui nga b'i ts'ín t̃jít'aha éhen Nt̃ianá:

Ngjiñi nk'a ján nga ngjiko xi jakj'á,
k̃o t̃u kitsjáhá r̃a x̃ut̃a ñi xi nda.

⁹ ¿Nkú tsuhu ra nga ngjinji? Kui xi tsuhu ra nga tjun ngjijen má nankaha t'anankiu. ¹⁰ Kō xi ngjijeē, kui xi ta ngjinji má 'yún nk'aha nk'a ján tū xi ts'íntjusuhun ngayjee ni xi tsichuba.

¹¹ Kō kui kikjin xi kitsjá nga tjín xi kama já postru, kō nga tjín xi kama já profeta, kō nga tjín xi k'uénijmí én nda tsuhu Ntíaná, kō nga tjín xi kama já bastuu kō já maestru. ¹² Kui kjuandoo kik'aihi jóo tū xi kuakúyaha ra xuta xi ts'e Ntíaná xi nkú ts'ín kuasinko xinkjín kō tū xi b'a ts'ín sakú nga'yúhun ra xuta nínku, kui xi yjonintehē Cristo. ¹³ B'a ts'ín nkuhú s'ejihinná kō nkuhú chaá yáha Ntíhi Ntíaná. Yohó nī ma kuichú maá xi tjíhin nga kuichú maá kō s'eyaná xi nkúhu kui.

¹⁴ Nk'ie nga b'a kamoo, najmi s'eyaná xi nkúhu jánti xi xi kjit'a kjit'a kj'ai ts'ín s'eyaha kō najmi k'uaintee tsa tū mí ni tsetsehé xi sakúyaná, tsa kui niu xi kjé'yúnná nga mjehe k'uanachaná. At'aha kui niu xi ts'ínchjén já maña xi ni tsank'a bakúya.

¹⁵ Tū sa ní én xi naxu chubaá at'aha tjoná xinkjá. B'a ts'ín sájihinná Cristo, kui xi nintaku xuta nínku.

¹⁶ Cristo ts'ín nga ngayjee yjonintee nkuhú bichú mako xinkjín kō b'a'yún sisihin xinkjín ngatentee ni xi tjíhin yjonintee. Tsa ngatentee yjonintee ts'ínxá sisin, ngayjee yjonintee sá sisin kō sakú nga'yúhun nga binchajin kjuatjo.

B'i ts'ín tsakúya Pablo xi nkú ts'ín tjíhin nga kuintsubaá nginkun Ntíaná

¹⁷ Kui nga b'a xihinnuu kō ngajoho Nda Ntíaná b'a xihinnuu ma. Najmi b'a ta n'e bintsuba sahanu xi nkú ts'ín tjintu xuta xi tjín asunntee, xuta xi ni tiya ts'ínnkjink'un. ¹⁸ Kui xi ja kis'ejyún

kjuankjintak'uhun kō najmi tjīntu tík'un xi nkú ts'ín ts'ínk'íentu tík'un Ntíaná xutá xi ts'e. At'aha ja kits'ín ndjá animaha kō najmi tā mankjihin rá ni xi ts'e Ntíaná. ¹⁹ Ja najmi tā tjīhin rá kjuasuba kō ja kits'ínkjas'ehen yjohō ni ch'onk'uun. Najmi tā b'éch'ohō rá yjohō nga ts'ín ngayje tíkjá ni xi chuntí nginkun Ntíaná.

²⁰ Jun bi najmi b'a tsu éhen Cristo xi tsakuyáihī tsa b'a noo. ²¹ At'aha ja kinu'yó éhen Cristo kō tsinchiyó ni xi ts'e, kō yo nga Jesu tjīñajihin ni xi naxu tjīn. ²² Najmi b'a tā ts'ín bintsubahanu xi nkúhu nk'ie. N'ek'óntjaiyo animanuu. At'aha ni xi kama mjenuu nk'ie ts'anachaha kō kits'ínkatsúhun. ²³ Tjīhin nga n'e tsetse ngáhanu animanuu kō kjuankjintak'unnuu. ²⁴ N'e tsetsoo yjonuu, at'aha Ntíaná kits'ínnda tsetse ngáha animanuu. Xi nkú ts'ín tjīyahá nga kixi kō je, b'a kits'ínk'íé.

²⁵ Kui b'a maha, najmi tā ch'anachaha ruu xinkju. Najmi tū én tsank'á chubo, at'aha nkuhú yjoninte mahaná ngatenteé.

²⁶ Nk'ie nga tíma kjannuu, najmi tū ngatitsun n'o. Najmi tū bintsuba kjon nku nistjin tantoq. ²⁷ Najmi tū 'baintohōo ndanindoo.

²⁸ Xi ndyjé ts'ín nk'ie, najmi b'a tā kats'ihin. Kats'ínxá ní kō kats'ínchjén ntsja nga kats'ín ni xi nda, tū xi b'a ts'ín kama kuasinkohō xutá xi machéhen rá tsá mí nihi.

²⁹ Ndaha nku én ch'on tsu najmi tū kuítju tsu'bo. Én xi nda ní chubo, én xi tsjá nga'yúhun xutá, tū xi nda kamat'aihin xutá xi kuínt'é énnuu. ³⁰ Najmi tū ni xi ts'ín'uhun Espirituhū Ntíaná n'o. At'aha

kui xi kik'ainuu tu xi chaha nga jun xi xuta xi ts'e Ntjaná nk'ie nga kuichú nistjin nga kuitjusun nga kama ndaí kikjinnuu.

³¹ Tich'onsjoo ngayjee ni ch'onk'un xi tjíntujín animanuu, kjuakjoon ko kjuastintoo. Najmi tu ch'íya kjon, ko najmi tu ch'on 'mihíu xinkiu, ko najmi tu ngat'aha tu mí nihí ni n'e uncho xinkiu.

³² Nda ní chasohó xinkiu ko chasenimohó xinkiu. N'e ndyjat'ohó xinkiu xi nkú ts'ín kisakújinnuu kjuan'endyjat'a ajihin Cristo.

5

B'i ts'ín tsakúya Pablo nk'ie nga ñá xi ntíhi Ntjaná

¹ Ntí tjohó Ntjaná jun, kui nga b'a ta n'ehenu xi nkú ts'ín Ntjaná. ² Xi nkú ts'ín y'ejñajin kjuatjo Cristo nga kits'íntjoná, b'a ts'ín tintsúbajiun kjuatjo. Kui xi kitsjá yjohó nga k'ienntjáíhiná. Kui xi kama nku chje sinjne xi kin'ekjas'ehen Ntjaná.

³ Ja kikj'áts'enuu Ntjaná. Kui nga ta santaha najmi tjíhin nga chubanijmíyahanu xi nkú ts'ín chuba fantukohó xinkjín xuta xi tjín, ko tsa tu mí nihí ni xi chuntí nginkun Ntjaná, ko tsa kjúásihuun ni xi tjíhin xuta xingisoo. ⁴ Ko najmi tu chubo én xi najmi nda tsu, ko tsa én ton ch'on tsu, ko tsa nku én xi najmi nda fane, at'aha najmi chumi ni chjíhi ra ni xu'bo. Tu sa ní én xi tsjáha máb'achjíhi Ntjaná chubo. ⁵ At'aha ja yo nga xi chuba fantukohó xinkjín, ko xi ts'ín ni xi chuntí nginkun Ntjaná, ko xi fásihin ni xi tjíhin xuta xingisoo, kui xi najmi tsuhu ra nga Cristo ko Ntjaná kuatéxumaha. Xi tífásihin ni xi tjíhin xuta xingisoo, kui xi kj'ái ntia tjennki.

⁶ Najmi tū 'bainto tsa tjin xi k'uanachakonuu nku én tiya, at'aha ngat'aha ni xu'bi kjuakjahan Ntjaná nibánehe ra xuta xi najmi nt'é'éhen. ⁷ Kui nga najmi tū jun n'engujihin ruu yjonuu xuta xi b'a tjincha ts'in.

⁸ At'aha nistjin nk'ie má jyuun tintsu_{boo}, tunga nd'ai ja má ndzjeen tintsu_{boo} nga nkuhú makoo Nda Ntjaná. Kui nga tintsu_{bahanu} xi nkú ts'in tji_{hin} nga k'úentu xi tji_{ntu} má ndzjeen. ⁹ N'oo ni xi nda kō naxu kō kixi, at'aha kui niu xi bakúchji nga má ndzjeen tje_{henná}. ¹⁰ Tinchísjo má nihi xi sasí_{hin} Ntjaná. ¹¹ Ndahachí najmi tū n'o ni xi najmi chumi ni chj_{íhi} ra, ni xi ts'in xuta xi ts'e má jyuun. Tū sa ní t'ejñachiu nga najmi nda niu.

¹² At'aha tū ñáhá xí subahá maná nga n'ekjáá ni xi ts'in'ma xuta xu'bo. ¹³ Tunga ma chj_{íhi} ngayjee ni xi tjin nk'ie nga s'entuchj_í má ndzjeen, ¹⁴ at'aha nd'íu b'éjña chji tū mí nihí ni. Kui nga b'a ts'in tji_{t'a}: N'ekj'áíhi yjohi, ji xi kisufei.

Tisintjein ajih_{in} xutak'ien.

Tsa b'a n'ei, Cristo ts'jin ndzjehin.

¹⁵ Kui b'a maha, nda nda chasehenu xi nkú n'e ku_{intsu_{boo}}. Najmi tū ni xi ts'in xuta stj_{en} n'o. N'e nínú xi nkú ts'in xuta nkjink'un. ¹⁶ N'oo ni xi nda tū mí chubahá ni nga sakúntenuu nga b'a n'oo, at'aha ch'on chun nistjin xi kich'aá nd'ai. ¹⁷ Kui nga najmi tū nchini n'esjehenu yjonuu. Katumankjin nínuu mí nihi xi mjehe Nda Ntjaná nga n'oo.

¹⁸ Najmi tū n'e ch'iu, at'aha kui niu xi ts'in nga n'éé tū mí nihí ni. Tū sa ní Espirituhu Ntjaná katsej_{ihinnu}. ¹⁹ Salmo kō sohon ninku chubanijmíyakohonu xinkiu kō só xi nkú ts'in

kuakúyanuu Espirituhu Ntíaná. Ngayjehe anímanuu só kò n'etsjohoo Nda Ntíaná. ²⁰ Tu mí kjuahá ni tehente tjohoon máb'achjíhi Ntía Na'miná. B'a n'oo at'aha Nda Ntíaná Jesucristo ts'enuu.

B'i ts'in tsakúya Pablo xi nkú ts'in k'uéntuko xinkjín xuta

²¹ Chankjún xinkju at'aha Cristo tíyankjún. ²² Jun xi tí'minuu chjuún, chankjún x'innuu. B'a n'oo xi nkú ts'in tíyankjún Nda Ntíaná. ²³ At'aha xi tí'mi x'in, kui xi síjña títjuhun chjuúhun xi nkú ta ts'in Cristo síjña títjuhun xuta nínku. Xuta nínku kui xi yjonintehe Cristo, kò Cristo kui xi kits'ínk'ankihí. ²⁴ Xi nkú ts'in xuta nínku benkjún Cristo, b'a ta ts'in xi tí'mi chjuún tu nkjéhe ni katenkjún x'ihin.

²⁵ Kò jun xi tí'minuu x'in, n'etjò chjuúnnuu xi nkú ts'in Cristo kits'íntjo xuta nínku kò kitsjá yjoho ngandaha. ²⁶ B'a kits'ín tu xi kikj'áts'ehe. Ehen kits'ín jekoho kò ntánijua tsanéjnukoho ²⁷ tu xi ja tjíhin ra kjuachánka xuta nínku nk'ie nga kuichú nginkun. Najmi s'ehe ni chuntí, najmi ch'on k'ué, kò najmi s'ehe tsa mí nihi. Mje níhi Cristo nga je kò nga nda kikjin kama xuta nínku.

²⁸ B'a ta ts'in xi tí'mi x'in tjíhin nga ts'íntjo chjuúhun. Kats'íntjo xi nkú ts'in tjoho yjonintehe. Xi tjoho chjuúhun, kui xi tjoho yjoho. ²⁹ At'aha najmi tjín xi unkie yjonintehe. Tsjá níhi nichine kò kuhun xi nkú nga ts'íhin Cristo xuta nínku. ³⁰ At'aha ta yjonintehe Cristo tintsubajján.

³¹ B'i ts'in tjít'a: "Kui nga nku nda k'uéjñaha xi cháha nga k'uéjñako chjuúhun kò nkuhú yjoninte kuichú ma nga joo." ³² 'Yún nanaka ni xu'bi, tunga

nk'iehé nga nchjanijmíya Cristo kō xutā ninku ts'inchjén niu. ³³ Jun tjiḥin nga n'etjō chjuúnnu xi nkú ts'ín tjonuu yjonuu. Kō xi tí'mi chjuún katenkjún x'ihin.

6

¹ Kō jun xi tí'minuu ntí, tinú'yá'óhōon xi chánuu at'ahā Nda Ntjaná s'ejinnuu. At'ahā kui niu xi nda tjin nginkun Ntjaná. ² Ajihin kjuatexuma xi kin'ekjas'ehe Moise kui kjuatexuma xu'bi xi tjun títuya ni xi Ntjaná tsjáha xi kuint'é'éhen. B'a títu: “Chankjún na'mihī kō naahī ³ tu xi nda kamat'aihinni kō tse nistjin kamaha ri nga kuinchin asuntee.”

⁴ Kō jun xi tí'minuu na'mi, najmi tu chubā kjan n'ekō ntínuu. Tu sa ní tjen niyóhōo nga n'echó kō takúyohōo ni xi ts'e Ntjaná.

⁵ Kō jun xi tí'minuu xutā musu xi kich'atse, tinú'yá'óhōon xi já ntjanuu ei asuntei. Chankjún kō tinkjún kō ngayjehe animanuu tinú'yá'óhōon, xi nkú joyaha tsa Cristo tinu'yá'óhōon. ⁶ Najmi tu nku nk'ie nga tibasenuu nga b'a n'ōo, tsa tu xi b'a ts'ín nda skuehenuu. N'e nínú xi nkúhu xutā musu xi Cristo ts'atse. Ngayjehe animanuu n'ōo ni xi mjehe Ntjaná. ⁷ Nk'ie nga tín'o nku xá, ngayjehe k'un b'a nōo. B'a nōo xi nkúhu tsa nku xáha Nda Ntjaná tín'o. ⁸ At'ahā yo nga Ntjaná tsjá ngajoya ngáha ra ni xi nda kits'ín nga nkúnkú xutā, ndaha tsa musu xi kich'atse kō ndaha tsa xi ndāihī yjohō.

⁹ Jun xi tí'minuu já ntja, b'a tā n'ōo xi nkú nga tíxihin xutā musu. Najmi tu binchankjúhun. Ja yo nga nkuhú maha Nda Ntjanuu xi tíña ndjiojmi ján kō nga kui xi najmi ngabi ts'ín ajihin xutā.

*B'i ts'ín tsakúya Pablo xi nkú ts'ín k'úéndaá yjoná
tú xi najmi ts'ín nganahaná ndanindoo*

¹⁰ Ni xi fekuhu xi xínnuu, kasakúnuu nga'yún ajiñin nga'yún chánkaha Nda Ntíaná. ¹¹ Xi nkú joyaha já jun xi b'énda yjoho nga kján, b'a ts'ín n'ech'okohonu yjonuu ni xi tsjáná Ntíaná, tú xi ndjá kama kuinchahanu nga kuankín kontroho kjuamañaha ndanindoo.

¹² At'aha najmi xuta asunnte tibixkjankaá. Xi tjín níñi nga'yún tibixkjankaá, xi nk'a xáha, xi batéxuma asunnte ngatitsun xu'bi. Kui xi jáninda ch'onk'un nkjún xi tjín nk'a ján. ¹³ Kui nga t'endahanu yjonuu xi nkú joyaha já jun xi Ntíaná kitsjáyjehe ni xi ts'ínch'okoho rá yjoho, tú xi kuichúkuahanuu nk'ie nga kuichú nistjin xi ndjá niba. Kó nga ja tjínda sisinnuu yjonuu, ndjá tìncho.

¹⁴ Kui b'a maha, ndjá tinchahanu. Ni xi y'éña Ntíaná kó ni xi naxu nginkun, kui xi n'ech'okohonu yjonuu xi nkúhu já jun xi ts'ínch'oho yjoho. ¹⁵ T'endo yjonuu nga t'enijmíu én nda tsu xi tsuya kjuajyuhu Ntíaná. ¹⁶ Machjéhen nga n'e s'ejun Ntíaná, tú xi najmi tjín xi nkú ts'ín ts'ín'uhunnuu ndanindoo. ¹⁷ T'ejin tak'un nga Ntíaná kits'ínk'ankinuu. Chjúbó éhen, kui xi kit-sjánuu Espirituhu Ntíaná tú xi kuiskokohonu yjonuu.

¹⁸ Tehente chubakoo Ntíaná xi nkú ts'ín tsjáníyánuu Espirituhu. Chubakoo kó tinchíhuu ni xi machjénnuu. Tintsuba ndo kó najmi tú n'ekjioho tak'un nga chubantjo ngayjee xuta xi ts'e Ntíaná. ¹⁹ Kó tá chubantjainú nk'ie nga chubakoo Ntíaná, tú xi tsjáhana én xi kuinchja, tú

xi ndjá kuinchjahana nga k'uenijmía ni xi kis'ejña 'ma nistjin nk'ie, xi ja tīb'éjña chji én nda tsuhu Ntjaná nd'aj. ²⁰ Kui ngat'ahā éen kjíya'yúhunna an xi tsú'ba ngajohō Nda Ntjaná. Chubantjainú nginkun Ntjaná tū xi kuinchjahana xi nkú ts'ín tjihin nga kuinchja kō tū xi najmi tsankjuhunna.

B'i ts'ín kits'ínkje Pablo xujuin

²¹ Ngatentee ni xi tímat'an kō ni xi títs'ian kuitsuyanuu Tikiko, nda nts'eé xi tjona kō xi kixi títs'ínxát'ahā Nda Ntjaná. ²² Kui kjuaha títs'ínkjísehenuu tū xi chahanu nkú ts'ín tintsūbai kō tū xi tsjá nga'yúhun rā animanuu.

²³ Ntja Na'miná kō Nda Ntjaná Jesucristo kat-sjáha já nts'eé kjuajyu kō kjuatjo, kō kat'éyahā nga 'yún s'ejihín. ²⁴ Kjuandahā Ntjaná kas'ehe ngaten-tee xi tjohō Nda Ntjaná Jesucristo, kjuatjo xi najmi mahā feya.

Éhēn Ntīanā
New Testament in Mazatec, Jalapa de Díaz
(MX:maj:Mazatec, Jalapa de Díaz)

copyright © 2013 Wycliffe Bible Translators, Inc.

Language: Mazatec, Jalapa de Díaz

Translation by: Wycliffe Bible Translators, Inc.

Mazateco, Jalapa de Díaz [maj], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Jalapa de Díaz

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

e05183c2-7c34-5cdd-8c78-15ea51bd8cbb